

純
常
子
枝
語

純常子枝語卷二十二

萍鄉文廷式撰

希臘教於俄國功益甚大然其別派有莫魯干教一派一千六百六十六年俄國總牧師尼剛改正教會規則有株守舊規者遂析爲二自後俄國政府待此教甚酷屢窘逐其教徒有移住西伯利者又別爲莫魯干一派而黑龍江州之伯拉照夫琛斯克府之實業家多從之此教不行洗禮及聖祕禮等嚴禁豚肉煙草酒類恰與回回教相似其教徒勤儉富裕今益多傾向者然俄人於此教甚嫌忌待之之法律頗苛酷凡各人自信奉者

不許教化他人關莫魯干教之書籍總禁出版不許公
行祭祀拜神等余案莫魯干教俄國新志未著其名然
新志卷六云猶太教之外無論何國何教俱可行於俄
國惟希臘教新分門戶不服國家所立之章程所以奉
希臘教之人非惟妒嫉且欲害之近來不服俄國教派
之人略有一千二百萬名年盛一年按西伯利地誌所
記莫魯干之事亦其證也

遼史之大賀氏今譯爲達瑚爾氏契丹之名不知所出
達瑚爾氏則滿洲姓氏錄內亦有之滿洲地誌云現今
土著黑龍江沿岸及俄屬貝加爾州之間尙稱達瑚爾

人則達瑚爾與滿洲同種無疑

按此說略欠分晰

遼史所載頭

魚宴及置斃人獐人鹿人等官皆達瑚爾人之風俗達瑚爾人尤信薩滿教疾病出入必令薩滿祈禳卜其吉凶一如薩滿所言遼帝攻伐進退皆使薩滿卜之而後行又唐書所記如死尸挂樹上埋葬乃薩滿本教西伯利地誌達瑚爾人及索倫人一條云達瑚爾人宗教奉喇嘛教與滿洲地誌異又云索倫人言語同滿洲以與滿洲同種族故案 欽定三史語解遼史用索倫語金史用滿洲語迥不相同未知此書何所據也

海錄碎事卷七下引燕北雜記云契丹罵漢兒作十里

鼻猶言奴婢也按十里鼻蓋卽鮮卑之異譯古書多有鮮卑奴之稱此其遺語也

宋葉夢得石林燕語記高麗王徽誦華嚴經願生中國一夕夢至京師觀鐙爲詩識之曰宿業因緣在契丹一年朝貢幾多般是高麗人亦以契丹稱中國

諸國事情

五百三十一

喇嘛教之教職法律中有定數於

阿魯莽苦士人中選定受喇嘛僧侶長之職名由政府

俸給之東部悉弗利亞寺院三十四各寺院有僧長管

理喇嘛之外自羅魯列谷士骨只魯士叭列跌士哈叭

洛庫士片山五十之名稱

富永仲基出定後語下云淨飯王泥洹經佛躬欲擔棺
世界震動普曜經佛踊身虛空不受父王作禮增一經
養母大愛道沒佛躬舉牀一腳阿難奉一腳孟蘭盆經
佛弟子修孝順者應念念中常憶父母乃至七世父母
彌沙塞律父母不聽不許出家又或云減衣食之資以
養父母或云世若無佛善事父母善事父母者卽是事
佛大集經或云左肩擔父右肩擔母偏行大地亦不能報
恩父恩經是迦文之教所重全在孝也然如後世黃巢
大義渡事實狂子顛倒地獄之設亦爲此曹也大氏漢
土佛法多疏于親是本出于折儒家在竺土則殊不然

黃康大義渡事
出于正業贊

唐智嚴譯佛說師子素駄婆王斷肉經云聞月答言辦
素味無辜淨食祭祀天無辜淨食蓋謂自死肉也

龍樹菩薩福蓋正行所集經卷一曰佛住舍衛城時眾
會有二外道曰迦毗羅大仙烏嚧迦大仙按迦毗羅卽
劫比羅烏嚧迦卽嚧露迦譯音無定字也

海錄碎事卷八引譙子法訓曰人有無禮者其獼猴乎
雖人象而蟲質

晉嚴防相兒經一卷

五朝小說
魏晉六

義楚六帖七引王儉七志四部書目言文字者凡二十

九部九十九卷有古今奇字二卷郭訓作字屬篇

待一考

卷賈叔作作解字要一卷字指篇一卷郭訓作雜字音
七卷王延作作文字要一卷說文音隱四卷要用字苑
一卷葛洪作字指二卷李彤作

白樂天諷諫詩立部伎第五自注云太常選坐部伎無
性識者退入立部伎又絕無性識者退入雅部則雅部
之聲可知也沈存中夢溪筆談卷五云外國之聲前世
自別爲四夷樂自唐天寶十三載始詔法曲與胡部合
奏自是樂奏全失古法以先王之樂爲雅樂前世新聲
爲清樂合胡部者爲宴樂崔豹古今注卷中橫吹胡樂

也張博望入西域傳其法於西京唯得摩訶兜勒二曲是西域之音前漢已入中國鄭夾漈通志樂略云按今之樂有伊州涼州甘州渭州之類皆西地又按隋煬帝所定九部夷樂西涼龜茲天竺康居之類皆西夷也觀詩之雅頌亦自西周始凡是清歌妙舞未有不從西出者八音之音以金爲主五方之樂惟西是承雖曰人爲亦莫非稟五行之精氣而然余案郭茂倩樂府詩集卷二十一云大鼓十五曲小鼓九曲大角七曲其辭並木之鮮卑則亦有出於東者蓋樂之爲用在於感人隸任之音周用之矣采萬國之聲容備一王之制作亦何不

可之有惟明皇瀆聽雅樂遂淪沿及五代朝會差京府

衙門首樂官權充又各業胡部音聲不閑太常歌曲

見五

代會要卷七晉開
運三年劉渙奏

此則禮壞樂崩不能無責爾

余前錄希姓近閱趙鹿泉清獻集詩自注云漸慎行居
濟甯叩其得姓之源曰本姓賤先賢子賤後以字爲氏
也獨見遺於氏族略姓譜諸書自宋時遷豫章始隨音
呼改爲漸還居此三百年矣是吾鄉故有漸姓

容齋隨筆卷十六云梁武帝時有交趾人并韶者富於
詞藻請遷求官而吏部尙書以并姓無前賢除廣陽門
郎韶恥之遂還鄉里謀作亂余案漢末士大夫多避地

交州并韶或是并官氏之後除複爲單亦未可知然以
門籍論人阻其仕進適足生亂亦歷代之殷鑒已

聖祖仁皇帝御製百家姓有程賴刁斜句是今時應有

斜姓按斜字爲鍾之俗字此段作斗又康熙字典引姓苑宋處州刺史

斜洎按晉有松陽令鈕洎見隋書北堂書鈔一百一十

鈕洎陳刻誤作鈞洎疑鈕字或譌作斜故訛爲鈞耳姓

苑當是何承天書洎或入宋仕至處州刺史矣

宋史藝文志樂類有昭微古今琴操一卷是宋時有昭

姓

注輝祖元史本證證名篇人名之異者如也速答兒一

作也速帶兒世祖紀至元十九年一作也速帶至元二年一作也速

帶而成宗紀一作也速答而成宗紀大德四年一作也速迭而大德

七年一作也速迭兒兵志三又忙兀台一作忙古帶世祖紀

見一作忙兀帶紀屢見崔或一作蒙古帶紀至元五年一作

忙忽帶二十一年一作忙兀臺三十一年一作忙古河渠志二

兵志二一作忙古奄木海伯顏傳一作忙古臺高興劉是一

人而七名九名也地名之異者如班朱尼河亦稱黑河

懷都傳後改龍居河見雪不台傳一作班尤居河速哥

班尤河律尤花傳一作班真海子尤赤一作班真河里

傳一作辨屯河耶律阿又昔木土腦兒至元元年止一

作失木魯

特薛禪傳

一作石木温都

赤傳

一作失木

禿

傳

一作失木土

鐵邁赤傳

一作失門禿

昔兒吉思囊加歹傳

一作昔門

禿

阿刺罕小憐石脫忽憐傳

一作失木里禿

杭忽思傳

一作失畝里禿

台

傳是一地而六名九名也元史雖成於眾手何至一篇

之中前後頓異蓋所採原本文字多歧秉筆之人未敢

輒易致此紕繆良非偶然故譯語一事宜有科條詔示

於先一成不改如菩薩之號既定則布薩蒲薛之字悉

可從刪蒙古之文既彰則蒙哥忙兀之名固宜勿用今

者萬方輻湊九譯紛來鞮寄之司所宜考也又元史地

名歧異尤繁汪之所證尙多未備

明史藝文志譜錄類吳沈千家姓一卷按吳沈進書表
此書實與劉仲質吳宗伯同撰然約爲韻語凡姓一千
九百六十有八名千家姓則其書絕無攷訂不過村塾
讀本之類耳氏族之學唐以前尙有專家然元和姓纂
已多蕪累唐書宰相世系表亦每失之傳會宋邵思鄧
名世後未有成書凌氏之萬姓統譜夏氏之奇姓通特
類書耳未足語於類族辨物之學也余嘗欲使中國各
行省就今日之士斷使各上姓氏戶口編錄成書其有
宗祠義塾悉著之表婚姻壻之媒氏繼嗣屬之有司使
天下士庶行業人民流轉燦若列眉無有所隱一年一

表五年復大整齊之以示國中亦王政之要道也

楊升菴曰洪武中翰林學士吳沈等編千家姓以進傳之天下今世猶以宋時百家姓訓蒙失之矣余謂吳書實無以勝宋時村塾之木氏族之學必攷源流兼知種別非訓蒙之所急也若以爲識字計宜莫要於讀說文部首矣謝肇淛五雜俎卷十四云吳沈等千家姓以宋承天起爲始其中有怪僻不經見者而海內之人又有出千家之外者惜當時儒臣未能徧行天下廣蒐之也王文簡池北偶談卷十云文登叢大司空蘭本漢柱侯金日磾之後相傳曰碑四十五代孫永遷縣之費家觀

家焉遂以爲姓江西多淦氏舊傳亦曰碑後有金賦者
宋南渡爲兩川制置使以姓同北國高宗爲加三點遂
有淦姓亦見皇華紀聞按禹域之中西晉以來五胡雲擾推原
氏族訛變良多余嘗欲撰姓氏書徧徵天下譜牒存其
實證去其淆譌以今地望系之其祠廟婚姻之事悉先
箸於冊而官爲稽攷亦類族辨物之要政也

高詠遺山詩李中丞歌自注云黃連解爲宣邑所苦中
丞李公奏免其半善政也其詩云詔使索黃連徵書十
道宛城邊刻期採辦苦不早軍帖督催何草草朝攜長
鏡刷荒邱簪篁棘荆淨如掃我聞此物產益州棧道連

雲劍閣愁吳嘉紀陋軒詩打鱖魚云打鱖魚供上用船頭密網猶未下官長已備驛馬送櫻桃入市筍味好今歲鱖魚偏不早觀者倏忽顏色歡玉鱗躍出江中瀾天邊舉七久相遲冰填箬護付飛騎君不見金臺鐵甕路三千卻限時辰二十二第二首云人馬銷殘日無算百計但求鮮味在余謂當時官家不過採藥物嘗鮮魚而有司奉行病民如此可慨也且三千之路而限以二十二時則較後來之驛遞日行八百里者更速矣嘉慶一朝力卻貢獻棄玉之舉卓越後先仁哉

又案馮景亭校邠廬抗議云我朝定鼎之初特詔蠲除

故明各道額解物產戶工二部則例歲需上供令有司
支款購解然當時貢獻之弊尙如此

高麗忠於明自有清以來雖云內屬特羈縻之而已未
能得其心也偶閱高麗人詩多思故明之作江華李昌
行臺錄夜與古歡談明季事感賦云遼薊山川滿眼來
啟禎遺跡使人哀將軍意氣空傳首元老精忠尙乞骸
門戶竟爲千古戒封疆豈少一時才淒涼野史亭前路
逆旅寒燈酌酒盃天水安文瓊北游續草途中談萬歷
東援古事云安危機決不占旌東援曾勞啟此程上國
藩維關大勢狡奴封貢區深情帷籌尙有征遼策車馬

如聞渡浪聲蕭瑟風泉千載意天教江漢盡東傾三百
年矣而其士大夫之言悽惋如此則人之待藩屬固強
固未易可非也

秦之焚書所以愚民也愚民之術後世以科目乃民亦
遂以自愚非朝廷之獨智也秦之銷兵所以弱民也後
世禁民挾弓矢禁民用火器亦未嘗不略師其智特不
若秦政之苛耳然歐洲各國其治屬地之法則與秦法
相似俄之待波蘭禁報館不設學堂人人知之矣至俄
人於海參崴英人於緬甸及滇邊土司法人於越南皆
禁民用軍器不獨火器也卽刀矛之屬亦不得私藏焉

其所以弱民者尤酷於秦今時人或未盡知之也其謂歐洲各國皆欲開民之智盡人之才者乃教士之言非其政府之實意也然秦始皇銷鋒鏑而陳涉吳廣並起元順帝禁漢人南人高麗人不得執持軍器至元三年四月而韓林兒劉福通並興秦元皆旋踵而亡豈必器械之強遂足箝制天下哉

皇朝禮器圖式崇德八年造神威大將軍礮康熙十五年三月造神威無敵大將軍礮二十年造神威將軍礮余攷神威之號實沿明制徐光啟集崇禎二年奏云臣竊見東事以來可以克敵制勝者獨有神威大礮一器

而已一見於甯遠之殲敵再見於京都之固守三見於

涿州之阻截所以然者爲其及遠命中也崇禎二年歲

在己巳崇德八年歲在癸未故知後本於前按是時佛

亦薦西洋人湯若望善火器爲劉龍山所劾見邵廷采思復堂集劉宗周傳

近人作礮考者謂金人守汴城中有火礮名震天雷者

用鐵罐盛藥以火點之礮起火發其聲如雷爲火礮用

鐵之始又云虞允文采石之戰用爲礮余案周密齊

東野語記救襄樊一條云各船置火鎗火礮是南宋亦

有火礮兼有火鎗矣又張端義貴耳集云浮光未破之

前城東有鐵佛寺端平四年甃圍城礮聲震天鐵佛爲

之撼是元人之用礮不後於金

新譯西學淵源考火器考云紀元後七百五十七年中
國有礮隊之兵守長城威振沙漠至今塞北利亞人猶
稱道之是唐時軍中已有礮隊而唐書不載

又云印度古史曰汕士庫力特

按卽散斯吉之異譯

中紀其與埃

及戰云聖佛不留心遺下此火器威聲壯三軍百戰力
不憊風行而雷厲敵人悉轟斃印度詩人亦紀其事於
其集中云礮聲隆隆礮彈飛空橫燒遠掠在十確士之
中確士印度里數也約一確士合英里迷當四分之三
零據此或印度有礮先於中國

西人言硝磺本於中國而通雅云今有火器用

硝磺乃從外國
傳此法誤也

文秉烈皇小識言明莊烈帝入天主教余詢諸教中人
則言莊烈帝未嘗入教其入教者皇后周氏及太子耳
太子入教後主教者以歐洲古聖王之名名之曰公斯
達甲申之變法蘭西王路易起兵救明兵未出而病卒
遂不果

黃宗羲行朝錄卷八云日本三十六島每島各有王統
之所謂東京者乃國主也一國之權則大將軍掌之其
三十六各王如諸侯之職撒斯瑪王即薩摩於諸島爲最
強與大將軍相爲首尾乙酉冬崔芝遣人至撒斯瑪訴

中國喪亂願假一旅大將軍慨然約明年四月發兵三萬一切戰艦軍資器械自取其國之餘財足供大兵中華數年之用崔芝大喜丙戌四月遣參謀林籥舞爲使期以十一日東行將解維而黃斌卿時魯王以海在舟山斌卿爲水師都督止之曰大司馬余煌書來曰此吳三桂乞師之續也崔芝怒而入閩已丑冬以澄波將軍阮美爲使以苴夷乞師其王聞之大喜已知船中有僧湛微則大駭湛微在日本曾犯法故遂載經而返史臣曰宋之亡也張世傑營遣使海外某國借兵陳宜中亦身至占城借兵崖山既陷兩國之師同日至遂不戰而返今日之事何其與之相類

耶忠臣義士窮思極計海水不足較其淺深徒以利害
相權如余煌者眞書生之見也余記顧亭林海上詩云
此中不是無人世祇恐難酬烈士心其亦指是事歟
行朝錄日本有一島名膿泉按當是肥前日本此地初
名火前後以火字義近猛烈故更名肥前倭音火與肥
同梨洲作膿泉蓋別有所受

櫻花絕句

崇桃積李闕芳華海外尋春興更賒十日淹留何所事
少陵擬賦海棠花

遊屐聲誼笑語和鷗絃象撥奏倭歌醍醐故事無人記

獨對繁花喚奈何

鶯聲霞外

霞外鶯和歌篇名

喚春回十里雲光錦障開如此仙

山真縹緲玉環何日肯歸來

櫻花有楊貴妃櫻一種或云長崎某山卽鴻都道士

遇貴妃之仙山也

人間何路海漫漫雪白嬌紅子細看獨立無言桃李外

夜來風露恐高寒

杖藜

東郭先生履已穿杖藜處處訪山泉苔花繡石都成字
松影連雲欲上天六鷗退風聊此地五龍夾日待何年
奚僮報道辛夷落纔覺江南春可憐

虞美人

驚冠欹側蠻腰裊，佞就郎懷抱。阿奴衣薄曉寒欺，憑仗些兒酒力自撐持。餘香未散人何在，夢隔珊瑚海。琵琶湖畔水涵空，祇有殘梅斂恨向東風。

岳陽舊武平軍，向有天策府。戶部下免楚興寺科率帖，開運三年二月二十四日，文字係書吏稱典稱副驅使官簽書官桂管觀察處官王天府學士鎮南軍節度判內諸司馬武穆亦自係天策府將軍江南諸道都統，尙書令楚王衡後書押蓋五代時藩鎮行移百餘紙如郡掾曹縣令長皆攝至祥符已後始書正官，有稱天策府

知客元監州發運使序銜在知軍之下監州恐今通判職發運使蓋藩鎮轉輸之官耳亦恐是監州之類

洞庭山之北宜春水出焉韓退之詩朝發宜春口卽此

地也

宋范致明岳陽風土記

水經湖水廣五百里日月出沒其中

同上

五代釋義楚六帖卷十四引長阿含云人有七種色金銀青黃赤黑紫等此西人以色分人類之所本

史通邑里篇云人無定質因地而化故生於荆者言皆成楚居於晉者齒便從黃余謂依此而言知言語形色不足以區人類也

隋天竺三藏闍那崛多譯觀察諸法行經卷二云何者
是十六種陀羅尼所謂阿字不生義故波字最勝義故
遮字四寶義故那字知名色生義故陀字調伏義故沙
字超過著義故迦字不失業報義故娑字諸法平等義
故伽字甚深義故他字勢力義故闍字超過生老死義
故車字斷煩惱無餘義故蹉字高出義故訖字住義故
嚩字教化邊地彌黎車義故

原注云梵本亦少一字
余按當重嚩字俟檢此

是得十六字所出陀羅尼

又十六種字陀羅尼入門如阿字無生義故波字最勝
義故遮字度四流義故那字說名色義故陀字布施自

守和合義故沙字六通智義故迦字不見業報義故娑
字諸法平等義故伽字甚深義故他字示現勢力義故
閻字示現生死義故义字示現忍力義故車字吐極惡
煩惱義故娑摩字自大證覺義故娑他字說處非處義
故多字說盡邊義故

元時加比尼東游紀略云蒙古人頂髮兩旁全行剃落
與耶蘇教之修士同而頂正中處留髮甚長四周餘髮
分綰二辮嗣復合辮爲一垂于腦後

言語通行於各國必由商務之力今英吉利國之語徧
行於各邦而前數十年則固習荷蘭語也又前二百餘

年則固行葡萄牙西班牙語也然歐洲之兵學半開於
蒙古而歐洲之商務多沿於回人穆罕默德之教有商
律焉保護之勸勉之無不至也稅商賈之什一爲之治
道路繫井泉建道標於是沙漠始可往來物貨始得流
布蓋其時各國無不研習亞刺伯語者今歐洲數目記
號猶用亞刺伯字而南洋各貨仍多用亞刺伯文者職
是故也乃或詆蒙古爲殘酷之朝而謂回教爲遏民之
知識者豈其然哉

晉書輿服志云古者貴賤皆執笏有事則搢之於腰帶
所謂搢紳之士者搢笏而垂紳帶也今制不用笏而列

名仕路者仍謂之搢紳後漢書霍譖奏記曰宋光衣冠
子孫文選沈休文奏彈王源曰衣冠之族日失其序注
引袁子正書曰古者命士已上皆有冠冕故謂之冠族
然則士庶之別當在於此今制有身家不清之禁亦略
存漢魏遺風異時民習短衣俗重平等必有視此爲迂
謬者然貴貴之理亦因乎民心之自然不必賤古貴今
是丹非素也

倭名類聚抄卷六引四聲字苑云笏手板長一尺六寸
闊三寸厚五分原注云唐笏品天子玉諸侯象大夫魚

鬚文士竹木

按玉藻一尺當
是二尺之誤

朱子語類

九十一

云今官員執笏最無道理笏者只是君

前記事恐事多須以紙粘笏上記其頭緒或在君前不
可以手指人物須用笏指之此笏常插在腰閒不執在
手中是朱子欲摺笏不欲執笏也執笏始於後周

困學紀聞七馬融注論語云所因三綱五常

見集解

大學

衍義謂三綱之說始見於白虎通

白虎通有三綱六紀篇

愚按谷

永傳云勤三綱之嚴太玄永次五云三綱得于中極天

永厥福其說尙已禮記正義引禮緯含文嘉有三綱之

言

按見樂記正義

然緯書亦起於西漢之末友人喬刑部樹枏

曰吾言五常不言三綱以五常出於經而三綱出於緯

也。湘人述之說尤恣肆。張孝達尚書爲作正綱篇。見勸學篇

余謂禮記哀公問孔子對哀公人道政爲大夫婦別父

子親君臣嚴三者正則庶物從之。言三者不言三綱也。

虞夏書五教在寬。今文尚書敬敷五教五教在寬於義爲備故從之而谷永乃

言三綱之嚴又其繆也。

五代釋可洪新集藏經音義隨函錄卷一云不批音紫

粹也。粹手捉髮也。既有執捉卽有所取也。勘大品經作

不取是也。江西許以執代之非也。按此江西音至今猶

然。卷三十後序云或有單收一字不顯經名首尾交加

前後失次。注云江西謙大德經音是也。只略得傳記中

隋羅是集及道地經兩帙中字勘會頗甚訛舛故知前
後亦爾據此則江西音蓋卽指謙大德書惟可洪亦未
見其全輕相訾詆而已又書中多引郭迒音又有西川
厚大師經音惜俱不傳後序又云謙師爲浙右奇人郭氏乃河東博士卷廿七
懣懣條又引南岳經音峨嵋音鏗刀條引孫恂及萇筠
和尚韻按與孫恂唐韻並引知當是韻部書也卷二十五作纂條引浙西

宋柳豫紹興重雕大藏音序云處觀討論集韻泊唐宋
韻部迒眾經音義楚六帖卷七引郭迒經音類決序
云按說文有一十三萬三千四百四十一字又諸佛經

其字更多就梵音翻譯時借聲而作也約部類有一百五十九部

元李衍竹譜詳錄卷五筴竹僧神珙云一名檀纂竹筴竹僧神珙云筴長節是神珙有小學書馬氏玉函山房但輯五音七弄反紐圖爲神珙書實未備也

唐試太常寺奉禮郎景審一切經音義序云古以音反多以傍紐而爲雙聲始自服虔元無定旨吳音與秦音莫辨清韻與濁韻難明至如武與綿爲雙聲企以智爲疊韻若斯之類蓋所不取按舊說孫叔然始爲反語此云始於服虔是在叔然之前古無輕唇音則武與綿正

是雙聲非旁紐也日本僧人嘑經至今尙有漢音吳音之別

又云近有元庭堅韻英及張戢考聲切韻今之所音取則於此按元張二書皆不傳倭名類聚鈔屢引考聲切韻蓋卽張戢書又云大略以七家字書釋誼注云七書謂玉篇說文字林字統古今正字文字典說開元文字音義

唐李洞送三藏歸西域詩云十萬里程多少難沙中彈舌授降龍知彈舌音爲譯語家所重

僞孔安國尙書序云若好古博雅君子與我同志亦所

不隱也正義曰易曰謙謙君子仁者好謙而孔君自作
掄揚云君子知己者亦意在教世欲令人覩此言知己
傳是深遠據此則沖遠於此序辭氣之間深有疑焉觀
其幹旋之詞可知其微旨也其虞書篇題疏云鄭意師
祖孔學何意鄭注尙書亡逸並與孔異篇數並與三家
同又劉歆賈逵馬融之等並傳孔學云十六篇逸與安
國不同是沖遠於僞傳已詳著其授受之無緒至謂散
在民間事雖久遠故得猶存者特以臆說之蓋奉詔作
疏不得不護傳耳禹貢荊州沱潛旣道正義云鄭注此
旣引爾雅乃云今南郡枝江縣有沱水其尾入江耳首

不於江出也華容有夏水首出江尾入沔蓋此所謂沱也潛則未聞云云然地理志及鄭皆以荆梁二州各有沱潛又郭氏所解沱潛惟據梁州不言荆州而孔梁州注云沱潛發源此州入荆州以二州沱潛爲一者然彼州山水古今不可移易孔爲武帝博士地理志無容不知蓋以水從江漢出者皆曰沱潛但地勢西高東下雖於梁州合流還從荆州分出猶如濟水入河還從河出故孔舉大略爲發源荆州耳此條甚知荆州之沱潛非梁州之沱潛而疑孔傳不合地理志且身爲博士親見圖籍何容迷誤若斯沖遠不欲明言略存辜較又呂刑

王享國百年僞孔傳云穆王卽位過四十矣正義曰穆王卽位過四十者不知出何書也周本紀云穆王卽位春秋已五十矣立五十五年崩司馬遷若在孔後或當別有所據是冲遠疑此傳非安國所作矣否則司馬遷從安國受古文尙書冲遠豈不知之而云若在孔後乎後世攻僞孔者實自正義開之固不僅東塾讀書記所摘數條也

僞古文尙書咸有一德受天明命正義曰緯候之書乃稱有黃龍玄龜白魚赤雀負圖銜書以授聖人正典無其事也漢自哀平之間緯候始起假託鬼神妄稱祥瑞

孔時未有其說縱使時亦有之亦非孔所信也此斥緯
書爲假妄在歐陽永叔之先僞孔傳旣託之西漢初人
故於緯說不能博采然猶時一有之如箕星好風之類特不顯著耳而宋人專
闢讖緯意適相合故雖吳棫朱子諸人疑之猶得施行
不廢歷八百年此亦其一端也

黃楚望辨感生帝云姜嫄履帝武敏歆而生后稷周人
特爲立廟而祭謂之閼宮君子以爲聖人之生異于常
人無異義也況生民之初氣化之始五天之精感而爲
帝王之祖亦何疑乎五帝感生之祀上世流傳旣久非
緯書創爲之說也且河圖洛書蓍策之數皆緯文也其

可廢乎

宋元學案卷九十二

宋元諸儒能尊信緯說不詆訾如楚

望者真可謂不隨流俗也

公羊莊二十四年傳夫人不偯注云妻事夫有四義雞鳴緹笄而朝君臣之禮也三年惻隱父子之恩也圖安危可否兄弟之義也樞機之內枕席之上朋友之道不可純以君臣之義責之按邵公之說必本緯書與三綱之義蓋同出一源然婦之事夫既不純用君臣之義亦難盡責父子之禮則夫爲妻綱與君爲臣綱父爲子綱卽已不同故余以爲三綱之說必就喪服言以明不二斬之義故與五帝之說固不相聯貫也

近人孫傳鳳浚民遺文六朝造象記考云周同瑋氏造象碑記姓名一百六十餘人姓同瑋者居半瑋爲字書所不載新唐書張琇傳載姓同蹄者二人豈瑋爲蹄之譌歟聖母寺四面秀碑記姓之異者曰南井曰昨和曰屈男曰鉗耳曰孀祖昨和見通志氏族略孀姐見周書文帝紀余按太平廣記有鉗耳含光又唐永淳二年有雍州美原縣頻陽府校尉同瑋武幹造象記是同瑋氏唐尙有之瑋字亦不作蹄

北嶽廟唐安天王銘有宣義郎行司功參軍汝南同瑋號錢王炯字學海珠云廣韻羌複姓有同蹄氏羌音無

正字故亦作珽余案元微之牋卧詩同蹄墜舞釵自注
云同蹄樂人姓字作蹄與廣韻合

瞿姓新唐書糾謬云瞿章傳乃瞿章葉廷珪吹網錄云
今通鑑考異所引新紀單行本作瞿章改正而轉失其
眞非溫公引辨之意

力姓吹網錄云更始二年刁子都通鑑考異單行本云
范書作力子都孫恂曰力姓黃帝佐力牧之後按今元
刻通鑑亦作力余按今福建有力姓

周子通書云二氣五行化生萬物朱子中庸章句云天
以陰陽五行化生萬物按陰陽五行卽日月五星之說

尙書以齊七政察之於天也五德各有感生之帝感之

於人也茂叔之說沿於漢學而紫陽述之也陰陽五行四字出漢

郊祀歌春秋元命包曰陰陽之性以一起人又云五氣之

精注曰五氣五行之氣交聚相加以迎陽道故致人和御覽三百六十一禮

運故人者天地之德陰陽之交鬼神之會五行之秀氣

也鄭注云言人兼此氣性純也皆茂叔說之所本

五行之說當以尙書大傳之言爲得之大傳曰水火者

百姓之所飲食也金木者百姓之所興作也土者萬物

之所資生也是爲人用余謂就人用言之則五行之用

備矣雷電風雨人亦資之以生而非一手一足之所能

用也若推生人之理物化之原則以五行言之未必勝於四大之說也伏生今文家言此爲最合古誼矣

白虎通曰五行謂金木水火土言行者欲言爲天行氣之義也余以爲言行者乃言其可見諸行事者耳

日月五星與人世相關之說不獨緯書言之以西書觀之歐洲人亦當有是說英吉利人田大里聲學卷七云兩音相和而能悅耳之理祕達果拉司之說謂諸音之高低合太虛之數則相和而悅耳其間徒深信之更謂七音相比之數等於七行星七行星謂日月五星距中火之路是以七行星行動亦成相和之音近時尙有算學士由拉

之說亦與此略同余謂此說雖爲田大里所不信然七
色旣並出於日七音安得不生於天祕氏山氏之說必
能言之有故持之成理當求其原說譯而考之又案唐
李潛風乙巳占卷一日占篇云律聲有清濁吹之以聽
其音以知世之和不和西戎猶解聽律音以辨國中國
若有聖人則東風應乎律矣又詩序稱聲成文之音世
有治亂音有哀樂人君宰相須深察之律應早晚和與
不和乃史官之要事也皆係之於日行故錄附於此以
示一隅今史官傳仁均薛頤等並不考用影律戶素之
流也余案候影候氣之法歷史詳之銅管依辰而葭灰

應律有明徵矣聲既與日相應又何必不與七政相通乎後世必有詳考而成定論者猶旦暮遇之也

尙書大傳曰五音天聲也八音天化也七始天統也其說與祕達果拉司相近按祕達果拉司韋廉臣古教策參譯作巴達國拉士周襄王時希臘人嘗過鐵肆聞攻鐵聲有清濁高下之殊恍然曰宮商角徵羽五聲盡於此矣又云天上行星有五五星相去遠近一定不易且五星繞地而行夜靜潛聽而樂器之八音由此可悟田大里聲學雖譏其一人獨聽之然如所蛤達士底之默有聲音贊其行事西人又以爲天使矣祕達果拉士之

說於理既合卽以其事實驗之能得宿命通者安知不能得夫耳通乎惜乎由拉之說余未得聞也

地名有不可解者如直隸省元時謂其直隸中書省也今特設總督管巡撫事而仍名之直隸果何所隸乎此與漢之司隸而魏晉以後遂爲司州者訛變正復相似又近制有直隸廳同知直隸廳通判夫各府同知通判者乃與知府同知此府通通之義亦爲同判此府也今直隸廳之同知通判乃獨知獨判矣何謂同乎循名責實當改爲知廳可耳

又如員外一官顧亭林所謂斜封墨敕之朝不可沿其

遺號者也而今則六部司員頓多額外於是又有額外員外郎矣豈可通乎

協辦大學士者以大學士員少特設此官協辦其事也今之除此官者多不任事特以其名耳如此似不如分宰執之名較爲得之

每部皆有兩尙書而兩尙書所辦之事則不分也左右侍郎亦各二人而四侍郎所有事於部者亦不異也但以滿漢之人分之而已於是每部堂官六人此自古所未有也

純常子被語卷二十二

純常子枝語卷二十三

萍鄉文廷式撰

文選阮嗣宗詠懷詩素質遊商聲沈約注曰致此彫素之質由於商聲用事遊字應作由古人字類無定也按此可知漢晉人用字假借之例甚寬今人注古書每云

字誤者坐不知此耳

檀弓季子皋正義曰弟子傳及論語作子羔古字通用

潛夫論論榮篇中堂生負苞堂唐同音中堂卽中唐也

又愛日篇曠句滿祈亦借祈作期耳

據此知漢時祈期音同期之作祈猶

旗之作

汪繼培箋引王紹蘭說並疑字誤非是

鄭豐荅陸士龍詩誰謂河廣增不容舟增卽留字

詩載又館

文選陸士衡擬今日良宴會詩揚聲當及旦注引春秋
考異郵曰鶴知夜半雞應旦明明與鳴同古字通古詩
十九首四五詹免缺注詹與占古字通

陳書儒林王元規傳其母欲婚土豪劉瑱元規泣請曰
姻不失親古人所重豈得苟安異壤輒婚非類姻不失
親蓋論語異文而釋文不載又通典五十梁大同五年
臨城公婚夫人於皇太子妃爲姑姪遂見之皇太子令
曰酒食之會亦有因不失親釋其辭意蓋言設此酒食
爲聯姻黨因亦當爲姻也

公羊昭十七年傳北辰亦爲大辰何注云北辰北極天之中也疏云天中也者以天面言之然則極者取居中之義矣而春秋說云北者高也極者藏也言太一之星高居深藏故名北極也與先儒說違其何氏兩解乎按春秋說當是緯說邵公不取固無不可而疏解以爲何氏兩解所未詳也又哀十三年注吳乘勝大會中國齊晉前驅魯衛驂乘滕薛俠轂而趨疏云齊晉前驅云云者春秋說文也天下盡會而春秋說特舉其六國按何注用緯說者多矣然不得謂緯說卽何解也太一高居與春秋合誠圖義相近淮南子曰帝者法太一論語爲

政以德譬如北辰鄭康成以無爲釋之亦用春秋說
治天下之政井田封建而已矣齊天下之教君君臣臣
父父子子夫夫婦婦而已矣此儒家之大義推之百世
驗之萬國而不易者也其有議此者未之思也

李太白嘲魯儒詩云魯叟談五經白髮死章句問以經
濟策茫如墜烟霧死於章句弊尙如此況今之死於制
藝者乎日本人譏中國中五經之毒夫五經則安有毒
毒在科舉之學耳科舉之學盛則經學亦衰況於經濟
哉故欲勵人材必革今日之科舉斷然無疑也

續印度紀略

古教集
卷二

云印度有謂世界汙穢必須跳出

方能得好乃作一大籠懸聖樹間置身其中若巢居焉
日日禱祝刻刻持戒又有謂人必覓一淨地或路旁或
街內或山頂引領翹首仰天看日目不轉睛如是數年
四肢枯槁方爲苦練又有謂必立一高竿將人背縛用
二鐵鉤鉤住懸在半空每日轉旋數次如是數年必待
頭目暈痛方爲苦練又印度有一大河名安葛因其土
人名爲聖水人浸其中祇露一頂鱷魚吞噬亦不肯避
有父母病重推入河中令其體潔以升天者兒女亦然
又有在大路旁以身投地作蠅屈狀一步一叩首者又
有用大車載泥胎若干左右森列旌旗飛揚數千百人

輦之前進作歌度曲最爲熱鬧乃或攀轅而來投轍而死便爲苦練可以升天又其地多高山峻嶺人至絕頂或自投而下或人推而下碎其皮膚斷其筋骨卽爲真心修鍊按翹目投巖鳥窠水處屢見釋典並示譙訶至於因病投江卧轍覓死則變本加厲有過昔時蓋以憂患之來茫無終始盡此形壽種彼樂因費大既有前修天報豈無實據特報盡還墮未斷無明此則釋迦大聖普渡之慈心而二千五百年來苦行一門固未嘗或止也

又彙參記越蛤一派有能行法將五行壓倒使身心不

動月餘不飲不食如龍蛇之蟄邇聞會中有得道者一
日身死同人殮之棺槨停在室待三四十日視之居然
復活真古今之異聞也按印度教法奇異如此故非身
通其學者未易非之越蛤卽噉露迦之異譯西人言二
十世紀之學術必趨於神祕家故近時研究婆羅門呪
語及佛教呪語者頗多然則印度之宗教或旣衰而復
盛未可知也

道家之符籙術家之前知皆闢神祕之學不可廢也

越蛤或譯作月

各

史通邑里篇自注云今西域胡人多有姓明及卑者如
加五等爵或稱平原公或號東平子爲明氏出於平原

卑氏出於東平故也按此則知北朝文字爲虜姓敘源
流者同此假借蓋亦多矣明氏至今尙有之而卑氏已
極罕見又不知何時復加改易此釐定氏族之難也

印度尙有巴利亞族爲最賤種族在四種之下幾於不

以人類云

見近人
印度論

日知錄卷二十三云自洪武元年詔胡服胡語胡姓一
切禁止如今有呼姓本呼延乞姓本乞伏指明初改而
并中國所自有之複姓皆去其一字氏族之紊莫甚於
此然今日則徒單宇文其姓猶在而亭林之所謂公孫
改爲孫者至今雲南尙有公孫有公孫和武舉
任雲南提舉司徒改

爲司者今廣東尙有司徒

開平縣司徒舊州有官至布政使者

如此之類

亦復至夥豈當時未奉詔改歟抑改而旋復莫知其時

歟日知錄又云洪武元年禁不得胡姓者禁中國人之

更爲胡姓

原注元時有此俗

非禁胡人之本姓也三年四月詔

曰天生斯民族屬姓氏各有本原古聖王尤重之所以

別婚姻重本始也朕爲天下主已嘗詔告天下蒙古諸

色人等皆吾赤子果有材能一體擢用比聞入仕之後

或多更姓名朕慮歲久其子孫相傳昧其本原非先王

致謹氏族之道中書省其告諭之如已更易者聽其改

正然有明一代賜蕃人以漢姓者亭林所記之外尙未

易一二數也非詳稽譜牒孰能知其本始哉

後魏書官氏志云魏氏本居朔壤地遠俗殊賜姓命氏其事不一然如胡周劉陸之類已概用華俗矣若其連爲姬姓之遺賀蘭爲李陵之裔輾轉更變抑又難詳者也通鑑釋例云魏之羣臣出代北者皆複姓孝文遷洛改爲單姓史患其煩皆從後姓史通敘事篇云亦有氏姓本複減省從單或去万紐而留于或止存狄而除庫求諸自古罕聞茲例柳芳氏族論云代北則爲虜姓元長孫宇文于陸源寶首之

章邱志言洪武初翰林編修吳沈奉旨撰千家姓得姓

一千九百六十八而此邑如朮如偶尙未之錄

日知錄二十三

之引顧亭林云今訪之朮姓有三四百丁自云金丞相朮

虎高琪之後

金史朮虎漢姓曰董按輟耕錄同今則但爲朮姓

蓋二字改爲一

字者而誤姓之時尙未登黃冊也以此知單姓之改並在明初以後而今代山東氏族其出於金元之裔多矣謝肇淛五雜俎卷十四云吳沈進千家姓以朱承天運爲始其中有怪僻不經見者而海內之人又有出千家姓之外者惜當時備臣未能廣行天下遍蒐之也

輟耕錄云蒲察曰李余按周必大思陵錄金國弔祭使蔡克忠宋史本紀作蒲察克忠是蒲察又可譯蔡於音

爲近疑當時譯姓未有定制也

廿二史劄記云金末多賜姓有賜本國大姓者如東永

昌賜姓溫都氏

舊作溫敦

包世顯賜姓烏庫哩氏

舊作烏古論

多

隆烏賜姓哈薩刺

舊作禾連嘉

何定賜姓必喇

舊作必蘭

馬福德

賜姓瓜爾嘉

舊作夾谷

楊沃衍賜姓烏凌阿

舊作烏林答

資祿賜

姓女奚烈李辛賜姓溫撒是也其功多力大者則竟賜以皇族之姓如郭仲元郭阿憐李霆梁佐李咬住國用安張甫皆賜姓完顏氏是也

歐羅巴洲各國每以教分加俄主之必希臘教英主之必耶蘇教是也然以此能合其眾亦以此不能招徠遠

人中國則尊崇儒教而於釋回基督等教亦來者不拒
然二百年來所以安集蒙古西藏者佛教之力也松文
清綏服紀略圖詩注云康熙二十七年喀爾喀眾議就
近投入俄羅斯請決於哲布尊丹巴呼圖克圖呼圖克
圖曰俄羅斯素不奉佛俗尙不同我輩異言異服殊非
久安之計莫若全部內徙投誠 大皇帝可邀萬年之
福眾欣然羅拜議遂決及呼圖克圖之死 世宗親臨
供茶乾隆間蒙古各部將叛又以章嘉國師手書而止
此皆前事之可徵者也

又按滿洲國俗所奉者薩滿教也而班第大喇嘛於西

歷一千八百二三十年間增設寺院增加喇嘛冀擴張

喇嘛教撲滅薩滿教

見西伯利地誌

是喇嘛與薩滿兩教固大

不合而本朝兼崇之者則以喇嘛爲蒙古國教滿洲蒙古世爲婚姻故宗教亦因之而並重也喇嘛西藏語無上之義而佛教所謂無上師蒙古稱僧爲喇嘛者崇尚之也明史喇嘛字作刺麻

方觀承松漠草詩注云畢赤克圖有字之謂也山在顏靄之南石壁如削鐫度人經用古梵書填以黃金旁有畢赤圖壩四楷字道整徑尺蓋元時遺蹟也按畢赤卽筆忒黑之異譯至元譯語文書曰必赤度人經乃道家

經典何故鐫以梵書尤不可解 朱子語類百二十六

云度人經生神章皆杜光庭撰

輟耕錄至正氏族漢人八種有女直有竹因歹又有竹

亦歹至元譯語女直曰主十

疑一字之誤

歹疑竹因歹竹亦

歹皆女直之別種耳竹因竹亦主一皆女直之轉音元

祕史作主因譯語又云漢兒曰托忽歹蠻子曰囊家歹

回回曰撒里荅歹輟耕錄色目三十一種有回回又有

撒里哥未知卽一種中略有分別否又有兩火里刺則

不可解西伯利地志

三百十五頁

云蠻子人支那之移住民

蠻子者自由民之義或脫籍人之義陶氏所記蠻子疑

亦此類託忽歹疑卽桃花石託忽與桃花音近

後漢書臧洪傳注引謝承書洪父旻遷匈奴中郎將還京師太尉袁逢問西域諸國土地風俗人物種類器具答言西域本三十六國後分爲五十五稍散至百餘國其不與中國同者悉陳其狀按此可知漢時頗重人種之學惜百餘國名後世不甚可考矣

洪鈞元史各教名考云木速蠻卽天方教聞諸波斯使

臣木速兒義爲正教蠻謂人類阿剌比語也

按英語亦稱人曰蠻

或沿用阿剌伯語耶答失蠻亦木速兒蠻教中別派背有教士伯

克答失創行是教遂以人名名之今土耳其國內尙有

此種教人按至元辨僞錄云達失蠻叫空謝天賜與顧亭林山東考古錄又作達識蠻

至元辨僞錄之迭屑或卽以爲聶斯託爾教之轉音然

則聶斯託爾派亦奉彌失訶

卽摩西

而不專奉耶蘇者也

西書言元憲宗時教王使人路卜洛克至和林則已有

聶斯託爾教人爲之譯語邱長春西游記云九月四日

宿輪臺之東迭屑頭目來迎豈卽是歟

洪鈞自注言有西游記注今未

見其書聶斯託爾旣創議言耶蘇爲立教之聖人非卽上

天之子則必遠循列祖兼述摩西是可謂猶太之分支

而不可爲耶蘇之嫡派也惜不得其所著書細考之耳

西人教會書尙有言波斯
語派事者當譯而考之

元史譯文證補卷二十六波斯以箭頭字鐫石字形多
作箭頭作个字形西人名爲箭頭字按箭頭字卽巴比
倫之尖桴文古教彙參言挪亞出方舟後住亞細亞洲
中間其三子閃含雅弗守業不遷始造文字曰尖桴其
文無字母亦無個數叶韻諧聲運用最爲靈便日本人
又譯作楔形字西人有亞里西亞腓尼西亞埃及希臘
諸邦文字對照表言其本源皆同一象形今日西人文
字多由亞里西亞改變亞里西亞字與梵文亦同出一
源

西人以爾雅歲名與猶太同雖未詳其說然爾雅實有
印度語今姑舉一說證之爾雅云狻麀如虓貓食虎豹
狻麀卽師子非中國獸也三代之前若果有之則詩書
紀載必不稱犀象而轉遺師子文選西京賦薛綜注云
狻麀一曰師子源順日本人當中倭名類聚鈔引唐釋
遠年兼明苑云師子一名狻麀狩谷望之注云說文無
獅字號字注虎鳴也一曰師子釋潮音曰師子梵言臬
伽見梵語雜名狻麀卽臬伽之一轉師亦臬伽之下略
然則狻麀也師也皆梵語之譌略非漢名其謂之師子
者漢人所加呼蓋穆滿西征之時已採用中天名物矣

穆天子傳乃膜拜而受注云今之胡禮拜舉手加頭稱
南膜拜者卽此音摸周時已譯用印度語此亦一證
唐人自稱涼武昭王之後而唐之宗室有李嵩或不得
其解按檀弓舍舊而諱新鄭注曰易說帝乙曰易之帝
乙爲成湯書之帝乙六世王孔疏曰祖乙是湯六世孫
與湯同名是六世得同名李嵩去涼武昭王世數遠矣
故同名而唐制不禁今之欲改己名者輒託於與遠祖
同名隨宜更改旣無定名又誣其祖尤非禮之所許也
差西溟湛園札記卷一云王儉孫承字安期與晉王湛
子名氏悉同以湛是太原派故爾若王筠子名祥則不

可筠亦覽後也此未諳古人不諱遠祖之義三國志張
昭傳注引張昭論應劭宜爲舊君諱議云曲禮有不逮
事之義則不諱不諱者蓋名之謂又云周穆王諱滿至
定王時有王孫滿爲大夫是臣協君也又厲王諱胡及
莊王之子名胡其比眾多

露國事情五百三云馬哈默德教徒有教會於倭哈每
三年選二人或三人主宰教會會議又有一人爲馬士
跌六人爲卡列士成立叨利克教會設於希麥海兒波
兒是等之會皆由宗教家以候補者試驗得之又云拖
蘭士加士比安馬哈默德教徒分二宗其一稱太陽宗

者麥甫點一人爲其教主其一稱希阿伊多宗派唯色
苦兒教徒承認之

天方教禁酒而伊思瑪哀耳之派不禁酒

見洪鈞本釋
刺夷補傳

教禁色而日本眞宗

今東西本願
寺皆此派

之派不禁色記曰飲

食男女人之大欲存焉天主教士不娶妻而耶蘇教士

娶妻亦以爲便也天方教禁酒禁博弈見可蘭經卷五

篇

釋教以釋迦爲世尊而婦女之皈依者則有觀世音

按

女皆皈依大愛道所以不然者
大愛道乃此部尼非優婆夷

道教以伯陽爲太上而

婦女之學仙者則奉西王母此增所本無爲行教地也

耶蘇自稱天主而婦女則多祀其母瑪里亞穆罕蔣德

自稱天使而婦女則特奉其女法圖昧

洪文卿譯補元史作法梯昧與

中國回教所稱之音不合教中人稱之曰法圖昧奶奶每年有大祭誦大經儀典甚盛

則飾所本

有亦爲行教地也蓋各教崇奉之眾必由於女子耶蘇

之教兼治婚姻宜其統治之人數多於各教矣

國家學卷二日

果子議權於婦女則宗教必逞其勢至於政教混一國家不復振其說可與余言互證

陸象山語錄曰臨安四聖觀六月間傾城士女咸出禱

祠或問何以致人歸嚮如此答曰只是賞罰不明余嘗

謂政治家當言賞罰宗教家則言吉凶賞罰明則行善

者吉作惡者凶天下曉然祈禳之事自息矣以六經言

之春秋賞善罰惡政治之書也周易但言吉凶悔吝而無有達占宗教之書也孔子作春秋云欲託之空言不如見之行事之深切著明蓋不欲徒以吉凶之說聳動後世也孔子爲政治家垂不易之法故周漢之間以素王稱孔子而不以教主推孔子者於春秋一經見之也宋范致明岳陽風土記云石瀨廟乃關羽廟湘州記云石子山溪西有小溪溪水映徹關羽南征嘗憩此因名羽瀨今廟亦以此名之隨軍土地三軍廟助順廟圖經皆以爲關羽并呂蒙行軍所置并字或疑有誤按自元以後關前將軍廟稱王稱帝而石瀨廟之名殆於湮沒矣岳陽風土

記有洞庭眞君廟有柳毅井而引靈姬記以爲附會今則洞庭君卽祀柳毅大約其誤當在宋後矣

趙彥衛雲麓漫鈔卷五荆門軍圖經關將軍廟在當陽縣玉泉山姜宸英湛園札記卷三云虞集廣濟禪師塔銘當陽玉泉景德禪寺者智者大師道場也相傳有神自稱漢前將軍關侯沒而藏神於此願佐師遂建道場焉自隋歷唐至宋主之者皆名世之士觀此則侯之護持佛法自梁時已然矣此時卽建關將軍廟於寺側元史祭祀志至元七年起每歲二月十五日於大殿啟建白傘蓋佛事移文樞密院入衛撥擡昇監壇漢關將軍神騎軍及雜用五百人明謝肇淛五雜俎卷十五云今天

下神祠香火之盛莫過於關壯繆然王自唐以前未之
有聞迨宋以鹽池一事遂著靈異王以破黃巾起家冥
冥之中又受天師號令不可解也太平廣記卷三十六會
昌元年戎州水漲浮木塞江刺史趙士宗召水軍接木
修開元寺後月餘有夷人逢一人如猴著故青衣云關
將軍遺來採木被此州接去云云按此卽近時所謂龍
木也戎州今敘州地疑是時已有關將軍廟矣

懺悔之法釋教天主教皆有之天主教行之多弊而修

教出焉同教之悔罪則名曰淘拜

但譯其音非取此義也

舊典亦

不過誦經祈禱而已數十年來有新同教其誦經則搖

動其身體吟哦其字句其悔罪之禮男子尙無大異婦

人悔罪則有所謂摩洵拜者誦經之頃使其阿渾誦如洪

徧體摩抑以爲可以消辜由是風氣大壞其餘規誡亦

多更革舊教惡之起而相仇乙未涼州之變亦由此也

近二十年新教且延及山東江南而回教之疆界亦頗

非前日之固矣

山東鄒縣有拔貢唐傳猷年七十餘以光緒己亥卒回

教人也曾以華文徧譯回經藏於家

輟耕錄嘲回回云阿刺郎葛反一聲絕無聞阿刺回語也

卷八是回文與阿刺伯同元人固知之會典卷八十曰

普兒

按他書或作普爾

以紅銅爲之其輪廓孔方之法一如內

地面用乾隆通寶漢字以葉爾羌阿克蘇諸地名回字

附於背按此不用清文而用回字者取其便於行用也

西洋朝貢典錄卷下云天方國修回回教其語用阿刺

畢國禮拜之寺曰天堂堂四方而高廣謂之懣阿白以

黃金爲佛像以玉爲座按回教無像設而此云以黃金

爲佛像深可疑焉

典錄言其交易以金錢名曰倘伽

日本倣效西法然至今三十餘年而民主之說不甚熾

者一則其國一姓相傳二千餘年本深則難拔一則變

法之初已慮及此故能防之於早也楠木後覺者學朱

子之學者也其明治七年有上華頂親王書云臣側聞
廟堂之上凡百臣僚主張西洋之學發一制出一令事
事模西件件倣洋彼西法非無可取者然兼本末而取
之則不得不變我皇極苟變我皇極則不得不動我皇
基苟動我皇基則必一變而爲共和政治而其所關致
奴於彼隸於彼亦必所甘焉甚可寒心臣僚用心如此
之謂何臣恐此或似列聖之逆臣而賣國者臣而賣國
罪不容誅矣楠木此書可謂有識楠木所著有世賜
廣誠中載此書然
一二世後或君失德變故棘則其國論猶未可知也非
上毅主權論序云距今百有餘年佛國有蘆鎖氏者憤

世矯俗放言自快所著之書巧刺銜心神使人去恭敬馴服之志有激昂不羈之意問者攘臂而起萬口響應要其所說謂主權在民不在君民意所同可以作法亦可以敗法可以奉君亦可以廢君顛覆爲天權違眾爲悖逆蓋古今立言之流未有如蘆鎖氏强悍而痛快者也世運寢變人心思亂民主之說入人之易如湯沃雪及其漸風靡一世有急欲試之事實者有乘機煽亂藉爲口實者佛國千七百九十一年憲法曰主權之大本確存國民何人非出於國民不得行政權曰耳義立王之國也其憲法乃曰諸般政權出於國民是卽蘆鎖之

說其施於事實者如此也變古爲今者蘆鎖氏之力蓋居第一焉而其毒之慘亦未有如蘆鎖氏之甚者也

國朝滿洲人生子每以祖父母現存之年歲名之余所見甚多七十一著西域聞見錄題椿園氏著而七十一實其名也洪文卿元史譯補乃以爲椿園自記其年誤矣國初董舍三圖識略卷七云近閱邸報見有均房總兵四十六者不解其義及覽元明諸紀載有元將軍五十八六十八監察御史九十九參政七十尙舍卿七十六與此正同今滿洲以數命名者極多此足證洪說之誤董圖石不解其義者由不知滿洲蒙古風俗也五代

史記唐明宗紀有吐渾使念九來念九蓋卽廿九字

元黎崩安南志略卷十二李氏世家云孝宗隆興二年

秋八月交趾入貢賜安南國名原注云自此始加封南平王三

年天祚薨龍翰立原注翰音札宣熙六年冬十月封安南國

王據此則安南國名出於特賜與周益公所記異翰字

今各書多誤作翰乾隆嘉慶間安南曾請改名南越紀文達時爲禮部尙書奏駁之見李宗

訪聞妙香

宰文集

志略卷十四言安南章服黼黻大粉華蟲組綬垂佩方

心曲領冕旒稍類中州又云其裝飾王侯及庶民常著

圓領玄裳白羅紉袴鞋尙革吳光奉使安南國初人事見三詞識

畧歸云安南冠服頗類中華束帶垂紳絳袍烏帽與明無異但其君臣兩足俱赤殊不雅觀按黎氏不記履制則吳太史之言當不誤耳

本朝避諱之法自世宗不頒諱後歷世崇寬光緒初年奉天府丞王家璧奏後偏旁一概不諱今俗閒猶有諱寧羣恬等字者不知國家制度者也惟列朝宗室近支王公與御名上一字同者或御名既改則

不復避

如永字縣字之類

或雖同而異其點畫

如弘字去一點之類 按此條

見大清會典卷一

今則奕字載字均免迴避且毋庸缺筆則

文宗以來之曠典也然開板者多不諳故事或應避而

不避或不應避而妄改蓋不可究詰而有司亦無有以
諱字責坊市者惟士子應試略存槩則耳醇賢親王薨
時禮部議奏請頒諱後不果行

道光七年重刊康熙字典諸臣奏云眞慎等字科場條
例並未言應缺筆查乾隆年間所刻 御纂春秋直解
於慎字眞字未經缺點擬遵照無庸缺筆按此偏旁不
諱之始

元盧疎齋集已佚然永樂大典載之極夥余嘗集而錄
之詩文各數十篇尙可得二三卷輟耕錄卷五云翰林
學士盧疎齋先生字處道涿郡人坐右銘大書一天

字其下細注六字云有記性不急性可謂知畏天者矣
張雨句曲外史集卷中盧疎齋集宣城校官本讀之一
過生氣慄然有懷哲人援筆而賦詩云人物西清第一
流曾看繡斧下瀛洲難求冀北千金骨空載江南數斛
愁小謝夢無青草句大蘇詩有景疏樓敬亭依舊峨眉
月付與騎鯨一作汗漫遊盛名若此而四庫館臣編元
人集乃獨遺之亦可異也

德國伯崙知理國家學卷四云加路王上尊號曰皇帝
教王恭捧寶冠如奉神命狀王使羅馬人誓忠貞勤王
自是主權始判爲二王賴教王之援助與媒介得羅馬

皇帝之尊號不得不酬其德故待教王甚厚後世羅馬人引當時之例爲口實盛倡皇帝從教王受政權之說可謂狡獪加路王之時教王新立見皇帝之使節誓忠貞不敢負以爲恆例不如是則不得爲教王又當時羅馬貨幣一面印皇帝之名一面印聖彼得並教王之名此二事足以知羅馬人之妄按此知誓不負國寶羅馬古教之成規至其狡獪得施則由於各國史學不講而書籍多出於教徒其誣元定宗及本朝仁皇帝爲習其教者亦欲用此狡獪也又卷五云俄國至彼得大帝更以教正及亞路喜曼德留天僧侶一種等僧侶組織一個

團體名曰神聖宗教議會舉教會統治上事務委於其
議員議凡十二名皆獻忠實奉公之誓詞於帝決要得
帝之允准故俄帝實兼大師之職俄國新志云俄國教
派以皇帝爲首所以大小各職必由國皇派定教主雖
可保舉他人然用人之權仍歸國皇露國事情第八編
云彼得大帝定宗教條例當時入脩道院者多逃兵役
故定嚴酷法律以待之法律成入脩道院者其數遂減
丁韞良譯公法會通第一百一章云昔俄布奧等國會
盟謂之聖盟蓋欲憑耶蘇之道以斷公法之案實屬乖
繆緣公法不以教爲本故也教與法判然爲二不可混

滑余謂宗教世界易爲法律世界此近時各國之大進步也

唐來鵠儒義說曰儒行篇非聖人之言程氏遺書卷十七伊川曰儒行之篇全無義理如後世游說之士所爲誇大之說觀孔子平日語言有如是者否余謂孔子之教不名爲儒自墨家有非儒之說以儒目孔門而孔門亦從而勿之遂以當時仲弓子游子夏諸賢門人之所行編爲儒行而託之於孔子猶阿難迦旃延結集之經概加以佛說也孔仲達正義曰案下文云儒有過失可微辨而不可面數搏猛引重不程勇力此皆剛猛得爲

儒者云云余按此當是漆雕氏之儒見韓非顯學篇兼有俠行者蓬戶甕牖不諂仕上則原憲之流也此篇正當出於戰國諸儒深可見孔教之多術耳

宋人每以儒行十五儒皆過乎中庸謂非夫子語孔奭軒駁之曰儒行云者固言儒者之行未嘗目爲時中之至行也李中孚二曲集特表章儒行一篇陳東塾師云儒行中博學以知服一言足以爲學者法

近人某印度紀行云莫羅多英之重鎮也咸豐八年兵變卽肇釁於此初時英製來復鎗須以脂塗彈方可入孔印度教與回教皆忌豬肉英人以新鎗發土兵試用

土兵不從遂殺英弁而叛余案猶太教回教忌豕肉遠
見紀載婆羅門教則牛戒狗戒爲重而此乃以豕戒生
釁或漸染回風歟西洋朝貢典錄云南昆柯枝國古里
一日南昆是爲王族二日回同是爲什族三日哲地不
是爲富族四日革令專爲庸保五日木瓜爲賤類不
食牛回回不食豕互以爲禁是明時猶截然不同近世
蒲刺那教見英吉利人雖與婆羅門教異而回不禁豕
也瀝江保印度蠶食戰史云丁巳按丁巳爲一月孟加
拉政廳交付兵新銃應用牛脂塗銃包印度宗教以牛
脂爲無上污穢物回教徒以豚脂爲無上污穢物故英
人常注意今當局者偶不注意遂致兵禍其敘述較翔

實矣

蒲刺那教所祀諸神甚多而以衛世努西窪二神及其妻爲尤夥方今盛行扒希納八士者祀衛世努之派也沙依拔士者祀西窪之派也二派教義所載之書名蒲刺那英人謂其成書在耶蘇紀元後八百年頃則當中國晚唐之世矣書中所載各派宗意及其禮拜儀式種類甚多婆羅門中稍有學識者往往非之然其教實由婆羅門教脫化而出所記世界創造及其他諸說悉出古教經典特強加衍釋以立新教而已

日本服天游儒士也其所箸赤倮倮中論佛法源流亦

具有本末今詳錄之論云竺土之俗尙治心學所謂外
道者先於佛數百年其學在修禪定乃住心一境使人
不散其功之成託言之生天就其成果之勝劣而層層
設諸天所謂色無色四禪四空處也釋迦之興初亦從
外道遊後別出機軸立一家言以生天爲未解脫以出
三界爲究竟演四諦以示觀境列四果以明階差所謂
聲聞乘也一代教法止於小乘佛入滅後弟子結集三
藏其迦葉等大阿羅漢於七葉巖內號上座部是佛門
正統也數萬凡聖於巖外號之大眾部則旁流也二部
蔑有爭競及佛後百年大眾部有一師名曰大天始別

立新義唱生死涅槃皆是假名之旨蓋後世大乘之說
胚胎于此云大眾部信而用之上座部惡其違舊義大
起乖諍互相謗毀後第二百年至四百年二部漸分破
爲二十部余按其詳見陳真諦唐玄奘所譯論逮五百年後馬鳴龍樹無
著天親諸師後先挺出見諸部紛紛欲唱方廣深義以
破之乃擬造大乘修多羅以彈斥小乘三藏教其徒又
撰述諸論以羽翼之摩訶衍法於是盛興按印度多以小乘爲真大乘爲僞此後南天又出二匠達摩創教外直指龍智傳
祕密眞言竺土佛法源流大略如此自漢明夢金人騰
蘭踰葱嶺出世之教乃始東漸最初譯出經四十二章

而已其經旨多依小乘而要歸在大乘觀無念無住無

修無證之說而可見爾

按此義已見明人四十二章經注

自後吳晉所

譯大小經論無慮數百部然時尙草昧教未大張渡江之後有釋道安天資聰敏潛思梵語獨得之見不藉師

承乃盡取諸經爲加驥括蓋承平已後諸經皆四十二

章之比摘錄要義各章別說

余按此釋家用道德經論語之體也

文義不

屬蔑有次序及至道安新立體統序正流通三分始判

大科細段綱舉目張東流經體於是一變安又聞西域

有鳩摩羅什欲以新義質之安卒二十餘歲什至長安

所譯一遵安規則且定爲恆式自是之後歷世翻經不

敢違安什約束云什所譯大小經論數十部其所主張

特在般若空宗耳梁天監中曇摩

按卽達摩

泛海至金陵教

外之宗於是始傳獨怪西來已後不聞竺土有復傳燈

者何也豈入梁見義學紛紛乃應變所創邪然亦唯曰

直指人心見性成佛而已若夫行棒下喝舉揚無謂之

談則實起于岳原

按岳南岳原青原也

以後蓋法久弊生不得不

然也

按此儒家之論禪家必不謂然

北齊惠文依中觀論立三觀授之

陳惠思思又依法華修三昧授之隋智顗顗教則依法

華爲演玄義文句觀則用三諦因爲之說摩訶止觀可

謂教門集大成之才也同時有終南杜順又別開一家

教則依華嚴觀則立四無礙而其四無礙理則與四諦
符夫諸師所設必教觀雙詮何也蓋非教難以取信非
觀無以示修乃弘濟之能事無怪其三諦不出於法華
四無礙無見於華嚴爾唐玄奘求法西遊歸獻之朝新
譯於是乎出且親謁戒賢稟學法相唯識宗旨遂乃東
漸開元中南天金剛智不空無畏三三藏連至長安俱
傳曼陀羅密教大抵從前一切修多羅靡不託之迦文
所說獨密教則言是毘盧舍那法身所說金剛薩埵受
之祕諸南天鐵塔後龍猛開塔承之薩埵而後流傳于
世荒渺之談實藉重之最矣按西域記有婆毘吠迦論

師至南天磔迦國呪芥子以擊開巖壁入彌勒阿素洛
宮之說意者三三藏附會是等事捏造毘盧緣起歟且
三三藏所傳亦唯壇場儀軌事法耳理觀則與台賢二
家無殊也意者一行之徒竊理於斯緣飾之事法也抑
佛法之行於支那莫盛於唐相宗則慈恩法華則荆溪
華嚴則賢首清涼密教則無畏不空教外則曹溪毘尼
則南山盛矣哉及五代法運式微宣流乏人宋興華嚴
有子璿律有元照死灰復然而亦尋燭矣其巋然存者
唯禪與天台之二宗邪且習禮之唱性惡有光於前哲
宗果之提無字貽謀於後昆下至元明往往有人然駉

末之勢識者不能無慨焉樗陰散語云服部天游年三十八剃髮爲僧此書或作於剃髮之後

列女傳黎莊公夫人衛侯之女也既往而不同欲未嘗得見其傅母閔夫人賢謂夫人曰胡不去乎乃作詩曰式微式微胡不歸夫人曰婦人之道一而已矣彼雖不吾以吾何可以離于婦道乎乃作詩曰微君之躬胡爲乎中路終執貞壹以俟君命君子故序之以編年按此聯句詩開柏梁宴之先者也李富孫詩氏族考亦以爲聯句所昉又云其說與序大異不可據夫劉子政所學魯詩也豈毛足據而魯不足據乎

以英民史略考之英吉利之先亦行多神教以屋敦爲始祖而以今之禮拜三日祭之其禮拜四日則敬雷神名道爾禮拜五日則敬比亞爾神主平安喜悅萬物發生之事禮拜六日則敬璫得爾楷乃土星之神也禮拜二日則敬暗神名丟遇者不吉又有旦神名義和斯德爾又曰主天明今時每年春日記念耶蘇復活之日即用春神義和斯德爾之名余案比亞爾者生物之天暗神晝神卽一陰一陽之事與婆羅門教波斯教大旨相似其所多者雷神與土星神爾其敬始祖屋敦尤合人本乎祖之義蓋敬天事祖近於人之生知自宗教家損益因革之而各國乃紛紛異俗耳

英民史略又云所有其敬之神曰鑪底神余謂此卽禮

記五祀中祀竈之事

古有竈爨之祭英民所敬當似祭爨然對文則別散文則通故不必

細爲分析也

金七十論僧佉所作故有破釋迦執破衛世師執語而

題外道迦毘羅仙人造蓋述迦毘羅之說卽題迦毘羅

之名當是印度通例然則諸經雖不盡出釋迦而亦概

標佛說正用此例而不必疑其依託也迦毘羅卽佉盧

英吉利女子著印度古昔性命書

書名來復因恩鈍度卽第亞

云上

帝未樹耶蘇教於地之前先折其一枝投之于印度

蓋言佛教甚近耶蘇也而明代天主教初來則專與佛

教爲敵其駁難之語書不勝書而其最詭異者明許大

受闢裂性篇

見明徐昌治破邪集卷四

云艾儒略曰天主初成世界

隨造三十六神第一鉅神曰輅齊弗兒是爲佛氏之祖
自謂其智與天主等天主怒而貶入地獄亦卽是今之
閻羅王然輅齊雖入地獄受苦而一半魂神作魔鬼遊
行世間退人善念卽天主亦付之誰何此等說亦非基
督本來所有蓋利艾初來爲鬭諍計強立諸說適以自
誣故後來基督教中亦無有述之者北村三郎猶太史
云耶蘇幼時之事新約全書全無紀載馬尼刺米國領
事拉沙兒哇甫云基督自十二歲至三十歲時常從馬

優茲忻教徒講學偕教徒栖住訥莎列士邑傍其教義
暗暗似婆羅門教世人云基督幼時學佛教蓋爲此等
雖歷史無徵難判眞僞姑存疑以俟識者焉余按此說
必有所據惜拉沙兒哇甫所讀之書未流傳於亞洲耳
回教未行之先亞刺比亞之古教以女神阿刺美多納
科沙二神爲眞神之愛女與基督教稱耶蘇爲神子相
同

王詠霓道西齋日記立亭耳梯譯言自主之神

宋曾敏行獨醒雜志入云京師戒嚴金人發礮攻城甚
力有獻策欲結索網障之其人歸自太原具見張孝純

王稟等設此而礮無所施朝廷以爲迂不肯試不知吳越將孫琰守蘇州嘗用此拒礮而淮南不能攻時號爲孫百計也此所說乃專用礮石之礮

墨子親士篇甘井近竭招木近伐

按招字當是構字之誤

莊子山

木篇直木先伐甘井先竭此墨家道家相同之說

朝鮮史綱云耽羅在南海中今濟州島余按沈存中筆記之屯羅卽耽羅也屯羅別有文字蓋卽用高麗之諺文元人李志剛有耽羅志略三卷

永嘉人樞密院祕書

見補遼金

元藝文志

唐會要同紇旣靖咸安公主請改紇爲鶻蓋欲夸國俗

俊捷如鵠者德宗從之

海錄碎事卷四上

以雁門爲文姓郡望見陳元觀事林廣記王集卷十此誤之始也

胡應麟筆叢曰柳玘訓序言在蜀時嘗閱書肆鬻字書小學率雕本則唐有刻本

純常子枝語卷二十三